

李文忠公奏稿

李文忠公奏稿

卷之三十七目錄

遵籌吉林防務摺

光緒六年四月初七日

派員赴吉差遣片

光緒六年四月初七日

戴宗為赴吉片

光緒六年四月初七日

部議籌餉分條核辦摺

光緒六年四月十三日

擬議剝船腳價片

光緒六年四月十三日

貨釐收支數目摺

光緒六年四月十三日

鮑超到津片

光緒六年四月十三日

薛煥請卹片

光緒六年四月十三日

郭松林請卹摺

光緒六年四月二十六日

李長樂請調直隸片

光緒六年四月二十六日

張家口糧餉請部備摺

光緒六年五月初八日

京引展限復額摺

光緒六年五月初八日

開通南運減河摺

光緒六年五月十三日

馬廠報賑章程摺

光緒六年五月十二日

請豁霸州官地租銀片

光緒六年五月十三日

奏留劉士奇片

光緒六年五月十三日

文報局請獎片

光緒六年五月十三日

定造鐵甲船摺

光緒六年六月初三日

撥補出洋肄業經費摺

光緒六年六月初三日

奏保馬建忠片

光緒六年六月初三日

巴西遣使議約摺

光緒六年六月初六日

訪醫保送摺

光緒六年六月十一日

籌辦畿防摺

光緒六年六月十一日

天津縣請予升缺摺

光緒六年六月二十一日

郭松林之妾殉節片

光緒六年六月二十一日

請催海防經費摺

光緒六年六月二十五日

淮軍軍需報銷摺

光緒六年七月十四日

軍需交涉洋務片

光緒六年七月十四日

李文忠公奏稿卷三十七

全集一之三十七

桐城吳汝綸編錄

遵籌吉林防務摺

光緒六年四月初七日

奏爲遵籌吉林邊將造船調取軍火各事恭摺覆陳仰祈

聖鑒事竊臣欽奉光緒六年三月十六日

寄諭銘安奏練兵必先擇將請調直隸通永鎮總兵唐仁廉及在
宣化練軍之郭長雲赴吉差遣等語該二員現在能否派往若畀
以總統吉林官兵之任是否相宜著李鴻章酌度具奏等因欽此
遵查通永鎮總兵唐仁廉前在提督鮑超軍中勦辦粵逆案稱驍
勇嗣調隨臣勦捻舊往無前自赴通永鎮任飭統馬步四營駐防
北塘海口要地捍衛近畿正當修守礮臺喫緊之際礮難遽易生
手派赴吉林至儘先副將郭長雲湖南沅州人向隨將軍多隆阿

轉戰有年經宣化鎮總兵王可陞稟委管帶練軍馬隊左營訓練精勤紀律嚴整邊防雖關緊要而吉林練兵需人自應遵

旨派往差遣其現帶馬隊應另委接替該將久當大敵曉暢戎機能耐勞苦若令募練數營戰守當可得力俟該處情形熟悉再酌委總統庶幾人地相宜又奉

諭旨該將軍以三姓一帶擬造舢板戰船請飭彭玉麟楊岳斌密為水師宿將一二人酌帶船匠水勇數十人赴吉舉辦等語從前長江設有長龍舢板等船剿辦內地賊匪至三姓一帶輪船可通舢板戰船是否足資守禦及應如何設立水師以防侵越之處並著李鴻章體察情形妥籌具奏等因欽此臣查水師之設要在察敵情審地勢從前長江為粵逆竄踞賊船民船以禦我師曾國藩故創造舢板戰船以制敵今各國輪船深入長江正慮舢板船礮

俱小不足制勝只可於內河淺港輪船不能到之處偶一用之況輪船全恃機器事理精奧亦非舢板水師匠所深悉近聞俄人在混同江口之庫頁島即日本送給之蝦夷島開礦設廠廣製輪船每由混同江駛入松花黑龍等江意甚叵測斷非舢板長龍等船所能制禦此敵情之不宜也吉林黑龍江兩省腹地如嫩江松花江皆灌輸於混同江而出東海江岸下游大半爲俄人侵占吉林之三姓阿勒楚喀伯都訥等城濱臨混同江深淺不一俄國輪船常來窺伺欲守陸路必須先備江防欲伐敵謀必須自固門戶殊非舢板長龍所能爲力此地勢之不宜也臣詳審輿圖體察情勢似宜在三姓附近水深溜大之處設廠籌造小輪船如粵東仿造蚊子船等式喫水不過七八尺上可駛行伯都訥省城一帶下可駛巡黑河口轉入黑龍江則操縱咸宜聲勢一振旣爲陸軍所

依輔又防俄船之侵越洵爲目前切要之圖惟輪船機器工料繁
重創辦之始貴能就地取材隨時變通非熟習西法製造者不能
勝任查有廣東紳士江蘇試用道溫子紹究心格致之學機器理
法洞徹本源在粵局製器多年往往自出心裁暗合道妙卽如劉
坤一奏令該員仿造蚊船用費甚爲節省志趣已迥異庸俗吉林
爲根本重地創始需才視粵東防務尤關重要相應請

旨敕下兩廣督臣張樹聲廣東撫臣裕寬轉飭溫子紹酌帶造船
得力工匠並將粵海關監督俊啟上年代購神機營設廠之機器
選擇合用者由海道運至奉天營口再由陸運吉以資創設船廠
之需溫子紹暨隨帶工匠機器赴吉川資均由該督撫臣暨粵海
關監督設法籌給俟溫子紹過津臣再諄屬其赴吉後察勘該省
煤木油鐵一切料物何者可就地取用何者須在外洋及南省購

通問厥之始及常年經費摺節估計約各需若干稟由臣及銘安等核明奏請

敕部於東北防餉內撥定專款次第興辦庶於吉黑兩省大局有裨如果溫子紹赴吉創造輪船得用臣與銘安等當齎懇天恩破格獎擢以鼓勵人才又奉

上諭所請由天津機器局撥給五百斤洋礮二尊三百斤四尊二百斤四尊馬上海鎗一千二百桿帶刺步鎗二千三百桿洋火藥三萬斤洋銅帽二百萬顆洋鉛彈子二百萬粒著李鴻章酌量撥給以資應用等因欽此查鎗礮藥彈為練兵所必需天津機器局專造洋火藥銅帽及各項子彈源源濟用洋礮洋鎗近來新式仿製甚費財力隨時由滬甯各機器局調取及山西洋訂購儲備無多茲飭軍械所委員會同機器局籌撥甯局所製十二磅來福開

花銅轆六尊車架箱具俱全並配炸彈六百顆木信六百六十筒
銅拉火一千枝恩費爾來福馬鎗六百桿恩費爾來福兵鎗一千
桿大銅帽二百萬粒鉛箭二百萬粒礮藥三千磅鎗藥二萬七千
磅共計合價銀一萬八千六百四十餘兩咨由銘安派員來津領
運西貢應用津局經費支細前項軍火價值飭行長蘆運司於積
欠吉林餉內扣抵歸還以免轉輸所有遵籌吉林設防各事宜謹
繕摺山驛覆陳伏乞

皇太后

皇上聖鑒訓示謹

奏

派員赴吉差遣片

光緒六年四月初七日

再欽奉光緒五年十二月十九日

上諭銘安奏吉林差遣需人請飭薦舉賢員一摺吉林分地設官以資治理需才孔亟著李鴻章於直隸候補人員內遴選爲守兼優之道府州縣各一員奏明發往吉林交銘安差遣委用等因欽此臣查吏治與防務相爲表裏吉林查辦墾荒籌設民官以清盜源而消內患必須得人助理臣謹於直隸候補及差委人員內逐加遴選查有候補道顧肇熙廉正精細穩練安詳候選知府李金鏞在直辦賑數年實心愛民洞達政體候補知州員啟章歷任熱河知縣諳習邊外民情心地樸實候補知縣查宗仁誠篤耐勞盡心民事以上四員均屬爲守兼優之員堪以派往吉林交銘安酌量差委理合附片具陳伏乞

聖鑒訓示

奏

戴宗竊赴吉片

光緒六年四月初七日

再查有直隸候補直隸州知州戴宗竊究心時務學識優長志趣純正久在軍襄辦營務於兵事吏事均有歷練河北道吳大澂平日極相推重吳大澂奉

旨幫辦吉林事宜昨過津謁商欲調該員赴吉襄助一切吳大澂將來如練兵設防須有志同道合之人商推機宜戴宗竊在軍雖有經手要務未便靳而不與可否請

旨飭調該員暫行隨同吳大澂赴吉由銘安等商酌委用俟該處防務稍有就緒仍檄調回直俾資協助伏乞

聖鑒訓示謹附片具

奏

部議籌餉分條核辦摺

光緒六年四月十三日

奏爲部議籌餉各條謹就直隸情形分別核辦恭摺仰祈

聖鑒事竊准戶部咨開具奏籌備餉需一摺欽奉

上諭一道鈔摺恭錄到直遵卽督飭司道悉心妥籌茲據詳覆前

來直查戶部原奏十條除停止工程核實折價捐收兩淮票本三

條應專歸戶部及兩江辦理外其應歸各省核辦者七條內嚴催

墾荒一條查直隸內地並無荒田間有旗民無糧地畝或山陽河

灘堪種之處均飭隨時認真勘辦惟地土瘠薄災歉頗仍徵收不

能足額尙無以熟報荒州縣隱匿紳富把持情弊其西北口外各

旗官荒馬廠從前章程不一非專歸地方官經理現已奏派道員

前往查辦自可逐漸升科無庸另議又溢解關稅一條查天津永

設新關以前凡內河外海陸路商販貨物皆歸鈔關完納常稅爲

數頗多自各國通商火輪夾板駛行便捷客貨遂改裝洋船完納洋稅致常稅大形減色此中外所共知者近年直晉豫頻遭災歉貨物滯銷現因海上訛傳商情疑慮收數較往屆幾減三分之二此又時事不同初未計及者北地貨稅遠遜東南津海關局面本不如閩粵等關之寬博目前情形如此將來能否暢旺尙難逆料惟有俟關期報滿如有羨餘卽令溢解其北洋統轄之山海關情形相同應一律辦理東海關尙未查覆另行核辦又整頓釐金一條查天津於同治初年創設百貨釐捐每年收銀不過二萬兩經臣改章整頓每年可收至六萬餘兩撥濟海口礮臺等項要用其局用薪費統計不及部定一成之數尙爲撙節所有歷年收支各款業經分晰奏咨此外惟大名甯河各有抽收貨釐該兩處商貨甚少每年只能收銀數千兩應係彙入保定天津練軍正餉開支

列報大名則令該府同知等兼管甯河則令該縣稽徵例未專設一局臣疊加考察皆係捐歸公並無完員濫役零星分卡益與東南各省貨充賑散布局卡者迥不相同也至津海山海等關洋藥釐捐向照定章按斤抽收充餉局抽羨釐作爲局費津海關以半年一次開冊報部山海關以一年一次開冊報部應仍照章辦理又嚴查交代一條查直隸州縣交代前因地方多故或未依限結報或算結而交項未清相率宕延殊不成事上年督飭藩司任道鎔嚴加整頓議定章程自光緒六年正月起無論升調及有事故一經交卸即責成該管府廳州將該員扣留會算依限結報所欠交項飭令完清其六年前交代未結者勒限算結已結而有欠款者一併追完逾限不結不完照例參辦該司嚴提舊欠力杜新虧現已辦有就緒至交代未清各員應行扣補扣委各節亦

與部章相同無庸另議又嚴核奏銷一條查直隸奏銷以地丁旗租爲大宗其餘雜項皆關庫款自應依限辦理據藩司任道鎔飭令各屬將每年應徵額款及現時徵解支存民欠各數按月造具四柱清冊呈送考核卽爲奏銷根據凡有徵存銀兩儘數提解不容絲毫虧挪仍飭該司俟奏銷時核明已未完分數員名開單詳奏其長蘆鹽課等項奏銷並飭運司仿照辦理又催提減成養廉減平銀兩兩條除長蘆運司津海鈔關減平銀兩向係按年解清無庸再議外查藩庫應收養廉及一切支款每年可扣減成銀三萬餘兩減平銀四萬餘兩惟地方著名瘠苦並無額外可籌之款可與之利歲收糧租等項向不敷出是以嘉道以前每年須有部撥銀二三十萬兩藉資接濟咸豐以後協款停止且須由直協濟新疆及東三省餉項又撥永定南北運各河歲撥修經費順天府

采辦硝價

東西陵部添設官兵俸餉雜支每年共添支銀二三十萬兩其隨時添撥者如

萬年吉地

患陵樹價及前數年疊辦大差橋道等項經費動需巨款尙不在內又值災歉頻仍每年蠲緩糧租不下三四十萬兩進款愈少出款愈多遂致羅掘一空歷年減成減平銀兩均經隨時挪墊支發並無絲毫存庫實較雲貴甘肅支絀情形尤甚今部中既不能如前協濟而外撥之款又難減裁若再將減成減平銀兩悉索無餘必更動形棘手餓殍重地庫儲斷不宜過空應請照留支省分辦理免其提解俾資周轉臣仍當督飭司道於應徵賦課釐稅各項認真整頓悉力經營杜暗耗之弊端勤當務之實事以裨庫款而

濟時艱所有部議籌餉各條謹就直省情形分別核辦緣由理合繕摺覆

奏伏乞

皇太后

皇上聖鑒敕部知照謹

奏

復議剝船腳價片

光緒六年四月十三日

再准江蘇撫臣來咨本年海運上年冬漕議將應由天津至通剝船腳價每百石銀五兩裁革等因當經轉飭遵照茲據天津等十八州縣官剝船戶以地方災歉之餘情形萬分苦累專賴加增剝價津貼辦公餉口若議裁革即將餉斃承運官糧更多掣肘公懇免裁呈由楊村通判天津道核議轉詳前來臣查官剝船戶專為漕糧而設每年所得工食及運漕水腳為數無多除去添置繩纜器具鋪倉席片稅梢通壩卸米腳力等項斷不敷該船戶水手等一年食用且通壩交米費追極嚴一有短數例應責令賠補遂致窮極舞弊攙和偷竊日甚一日各船戶多係無賴貧民形同乞丐雖監追拷打血肉橫飛於事並無實濟往往棄船而逃轉致無人供役必須酌增剝價方足以示體恤而資整頓是以臣於同治十

年開會同驗米大臣倉場侍郎商允江浙兩省自十一年起無論
正供籌備每裝米百石由江浙加給船腳價銀五兩當經奏奉
諭旨允准在案歷年循辦籌給各船戶具有天良到壩後偷短頓
少成效灼然今遽議裁革無以贍其身家卽難役其心力必致偷
盜虧短舊弊復萌殊於漕運大局有礙蘇省議裁此款固爲節省
起見但運務關係匪輕既已奉行八年忽欲一旦裁汰船戶人眾
幾有潰散之勢臣駐津年久體察情形深爲危慮自應仍照奏定
原案加增以昭平允除咨江浙督撫臣並行蘇浙各糧道查照外
理合附片具陳伏乞
聖鑒敕部知照謹
奏

貨釐收支數目摺

光緒六年四月十三日

奏為查明同治十年至光緒四年天津貨釐收支各數恭摺奏報
仰祈

聖鑒事竊查天津抽收百貨釐金始自同治元年初名義館釐捐
由前任三口通商大臣派委天津府督同紳士管理所收之款作
為津郡釐關練勇之用計自同治元年二月至十年正月收支銀
兩歷經前任三口通商大臣會同督臣奏報在案到任後因查
歷年收數短絀必須另定章程認真整頓飭令裁撤紳董釐關革
去義館名目遴委妥員接辦所收款項按月截數報解海防支應
局專款存儲備撥當於同治十年十月奏定大沽海口營制章程
案內陳明整頓緣由議俟收有成數先儘大沽北塘海口礮臺營
壘各項要用歸支應局附案報銷其礮臺等工仿照洋式辦理並

無例案可循應免造細冊等因在案查從前義館收數每年奉算
不過銀二萬兩改章以後每年可收銀六萬餘兩於餉需不無裨
助所有歷年收款均經截數報解支應局月存惟地方連遭災歉
需賑浩繁不得不量爲勻濟又因海防練軍正餉不敷閒亦酌提
應急業將撥過賑款軍餉月案奏銷其餘即儘各海口防營礮臺
等項核實動支至局用員役薪工房租等項統計不及一成尙爲
撙節前准部咨令將遠年釐金收支數目先行開單報部其現在
收支數目按半年一次造銷所有光緒四年以前收支各數應卽
先行奏咨飭據海防支應局司道分年分款查明彙開清冊詳送
前來臣查天津釐捐據報自同治十年二月起至光緒四年年底
止共收銀五十一萬八千九百兩共支銀五十三萬八千六百三
十九兩零撥核各數均屬相符其不敷銀一萬九千七百三十九

兩等舊行設法添墊候下屆續收提補至光緒五年以後收款正
當籌辦海防喫緊應仍照奏案先儘礮臺等項要用卽按半年開
報咨部查考除將送到清冊彙咨戶部外所有查明同治十年至
光緒四年天津貨釐收支各數理合恭摺具

奏伏乞

皇太后

皇上聖鑒飭部知照再大名府釐金係解歸保定練軍正餉開支
甯河縣釐金係解歸天津練軍正餉開支該兩處商貨無幾收數
極微與津郡情形迥別已隨時列入各練軍正餉報部核銷合併
聲明謹

奏

鮑超到津片

光緒六年四月十三日

再前浙江提督鮑超奉

旨來京陛見昨已附搭輪船到津臣晤談之頃據稱在籍起程時傳聞邊疆告警一時義憤所迫誠恐措置不及奏請調募舊部及早整備旋奉

寄諭飭令停止立即欽遵飛飭川楚舊部各將安靜回籍並未開募勇丁亦未稍張聲勢仰蒙

聖恩不加咎責轉悔前議之冒昧曷勝愧悚於寸衷臣與該提督前在軍營共事多年深知其血性忠勇不避艱險戰功實冠諸將之上此次涉江航海遠道而來晝夜焦思觸冒風熱肝疾內動舊傷復發加以眩暈咳嗽諸症形神頗覺狼狽臣勸其暫駐津郡延醫服藥調理俟體氣稍復即催該提督赴京泥首

闕廷祇候

訓諭遵行理合附片具陳仰慰

聖鑒謹

奏

薛煥請卹片

光緒六年四月十三日

再前工部右侍郎薛煥係四川興文縣人光緒六年二月初三日在籍病故據其家屬稟報前來臣查薛煥前在江蘇巡撫任內適值粵逆披猖咸豐十年金陵大營潰散蘇松郡縣皆淪於賊僅存上海一隅岌岌可危薛煥以撫臣駐滬兼署兩江總督並辦通商事務維時潰勇紛紛來投薛煥概拒不納設卡收繳軍器以絕後患調兵募勇布置防務忠逆李秀成率賊數十萬圍攻上海薛煥晝夜登陴連發巨礮殲斃多賊忠逆受傷宵遁遂派兵尾追克復松江府城分守寶山縣以固江海門戶厥後松滬寶山三城鼎峙卒能擋持危局維繫中外之人心同治元年臣率師入滬接督撫篆彼時釐金洋稅兩宗收數暢旺臣得以添募淮軍購求利器雖勢同孤注而羣寇漸次剪除迨克蘇常嘉興等郡藉非薛煥於存

亡絕續之交保此一綫餉源則臣幾無所措手薛煥既卸撫篆仍駐滬專辦通商聯絡遠人苦心經營諸臻妥協旋以侍郎在總理各國事務衙門行走數年告病回籍光緒元年奉旨馳赴雲南查辦滇案歷著勤勤伏查薛煥爲人伉爽明練前後服官政蹟頗多至其在滬固守要地以待援師實有裨於大局臣與其患難目擊所處時地之艱危未敢沒其微勞可否籲懇天恩飭部照侍郎例議卹之處出自逾格
慈施理合附片具陳伏乞

皇太后

皇上聖鑒訓示謹

奏

郭松林請卹摺

光緒六年四月二十六日

奏爲提臣因病出缺謹陳事蹟請

旨優卹迅賜開放恭摺仰祈

聖鑒事竊頭品頂戴直隸提督一等輕車都尉法福楞阿巴圖魯
郭松林於本年四月初三日接印任事疊據咨函於初四日忽患
痰喘之症尙能力疾辦公無如前在各路軍營積勞受傷舊症復
發醫藥罔效旋據代行提標中軍參將李際昌稟報郭松林於二
十一日病勢增劇因將提督銀印總統木質關防各一顆暨銀庫
鑰匙等件札交看守遵於是日戌刻出缺等情前來伏查郭松林
籍隸湖南湘潭初以親兵隨現任山西撫臣曾國荃攻克江西安
福縣首先登城遂以驍勇著名既而曾國荃克復吉安安慶兩府
城及進攻金陵雨花臺郭松林皆身行開疊著勞績同治元年

以游擊投臣上海大營臣察其英果邁倫饒有膽略始令募帶松
宇兩營交臣弟鶴章在前敵調遣遂漸添至八營北新涇四江口
之役粵賊兩次大舉犯滬郭松林與水陸諸軍苦戰卻賊大振軍
聲厥後淮軍克太倉拔崑山援常熟鏖戰江陰無錫之閒進攻常
州殲除羣醜郭松林常領一隊奮爲軍鋒復會諸軍分擄宜興溧
陽長興湖州等城皆克之旋偕提督楊鼎勳一軍航海援閩克復
漳州府及龍巖州城蒙

聖恩擢授福建陸路提督臣率師北剿捻逆郭松林復統武毅
奇字二十餘營與楊鼎勳各軍連蹙賊於山東膠淮一帶戰無不
捷東捻賴以肅清未幾而西捻張總愚一股直犯河朔蔓延山東
郭松林與諸軍分合不常縱橫馳驟大小數十戰斬馘萬計扼守
運防盡銳截剿俾捻眾不得喘息全股蕩平當以郭松林與劉銘

傳之功爲最多同治九年臣督師入陝郭松林仍以統將隨行旋居湖北提督任內多年頗能整頓營伍綜計郭松林在臣部下前後將近十載勦辦粵捻諸寇無役不從忠勇廉明善馭士卒戰功卓著實爲不可多得之將才本年奉

旨調補直隸提督臣以其年力尙壯思欲倚以集事郭松林亦感朝廷知遇且念時事多艱講求邊防海防勉圖建樹迨馳抵古北口接印後尙力疾視事冀稍痊愈卽帶印馳赴北塘山海關一帶布置防務乃蒞任未久齋志長嘆實堪憫惻合無仰懇

特恩賜諡並

敕下國史館立傳其湖南原籍及江蘇福建山東立功省分建立專祠靈樞回籍時由地方官妥爲照料以獎忠績而昭激勸再郭松林有子郭人濟郭人鴻郭人彥等年尙幼穉皆在原籍合併聲

明所遺直隸提督員缺緊要應請

旨迅賜簡放以重職守所有提臣出缺謹臚陳事蹟請

旨優卹緣由恭摺由驛馳陳伏乞

皇太后

皇上聖鑒訓示謹

奏

李長樂請調直隸片

光緒六年四月二十六日

再臣前奉光緒六年正月二十一日

上諭李鴻章所部淮軍久經戰陣亦宜有威望素著之宿將統帶
湖南提督李長樂如其才尙可用著奏調赴津以資倚任等因欽
此臣以李長樂向爲郭松林部下分統之將郭松林所部遣撤大
半僅留數營無力添募李長樂現任專閫若調津而有將無兵轉
置閒散應請暫從緩議覆奏在案維時郭松林尙無疾病正思奮
發有爲臣方慮直隸絀於餉力未能添置多營歸郭松林統帶不
足以盡其長因奏調郭松林舊部武毅步隊三營馬隊一營由鄂
來直擬於北塘迎東各海口擇要扼紮歸郭松林調遣布置今郭
松林遽爾溘逝實非意料所及目下武毅軍馬步四營已由襄陽
拔隊北上深恐抵直以後無人統率查李長樂勤明勇幹才略優

長隨臣轉戰多年歷著勲績前在湖北提督任內武毅軍久歸接
統兵將相習頗收駕輕就熟之效擬請

敕下湖南提督李長樂輕騎滅從剋日兼程北上如於半途與武
毅四營相值即可統以前進儻蒙

恩旨卽將李長樂調補直隸提督人地相宜呼應尤靈臣亦藉資
指臂之助臣爲選擇統將布置要防起見理合附片密陳伏乞

聖鑒訓示謹

奏

張家口糧臺請部餉摺

光緒六年五月初八日

奏爲張家口糧臺采辦各路軍糧懇

恩照案續撥部餉恭摺仰祈

聖鑒事竊查前因烏里雅蘇臺等處調兵防剿遵

旨任張家口設立糧臺采辦各路軍糧奏明請撥部餉以爲米價

繩袋員役薪工之需自同治九年十二月起已十二次奉撥部餉

飭委口北道分起采辦截至光緒五年年底實存正款餘平共銀

四千一百餘兩均經造報在案茲據口北道玉珩稟稱烏里雅蘇

臺各營光緒五年夏秋冬六年春夏季軍糧二千零四十石因上

年車價太貴未經起運已於奏銷案內聲明俟本年五月牛車開

行趕緊運發其六年秋冬並像運七年春夏季糧亦應一同起運

以濟兵食所需米價繩袋車價等項僅存銀四千一百餘兩不敷

甚鉅無款可支又駐紮庫倫之宣化練軍應需六年秋冬並豫運
七年春夏李口糧需用車價亦鉅查六年分僅存銀五千三百三
十五兩不敷開支其豫運來年腳價亦須豫領支用方免貽誤策
請奏撥前來臣查該道所稟關係西北邊防軍需勢難延緩相應
仰懇

天恩敕下戶部照案續撥辦運烏城軍糧銀三萬兩又辦運庫倫
光緒七年分庫平銀一萬四千六百兩以期無誤軍食理合恭摺
具陳伏乞

皇太后

皇上聖鑒訓示謹

奏

京引展限復額摺

光緒六年五月初八日

奏爲京商銷滯累深原停引目尙難復額請再推展五年藉保課
本恭摺仰祈

聖鑒事竊查長蘆京綱額引七萬二百餘道實則每年銷鹽不及
三萬包商人須按原額完課遂致包賠過甚力盡筋疲曾國藩及
臣先後奏請暫停二萬道部議均以五年爲限扣至光緒五年年
底限滿疊飭運司督商設法疏銷設立公櫃齊價整頓乃光緒元
年領銷引三萬四千四百四十六道二年領銷引二萬七千九百
道三年領銷引二萬七千八百六十道四年領銷引二萬八千八
百八十道五年領銷引二萬七千二百五十道均不及減贖五萬
二百餘道之數益引張本多銷路有限勢難全領也其滯銷之引
仍須各商包賠課帑且京城錢賤銀貴天津錢貴銀賤其中又多

虧折近年災歉頻仍鹽價運腳較前加重商累實深若再將停引二萬道責令復額則必多賠二萬道之課力更難支殊於鹺綱大局有礙據運司如山具詳請展前來臣覆查無異相應仰懇天恩准將京商原停引二萬道照案推展五年俟限滿察看銷數如能暢旺再行議加仍飭司督商設法疏銷以期起色所有原停京引請展年限緣由理合繕摺具陳伏乞

皇太后

皇上聖鑒訓示謹
奏

開通南運減河摺

光緒六年五月十三日

奏爲擇地接開南運減河分洩盛漲剋期挑築工竣恭摺仰祈
聖鑒事竊直隸南運河上承山東河南山西汶衛漳諸大川之水
其流甚巨汛漲每虞漫溢是以從前於東境四女寺哨馬營直境
捷地興濟等處共開減河四道以資分洩道咸年間減河皆就淤
廢迄未重開於是全河之水悉注天津三岔口一隅上游數百里
隄防既甚危險下口更不能容洩益三岔口係永定大清漳沁南
運北運五大河總匯之路僅恃一綫海河曲折趨赴大沽入海實
有壅擠不下之勢雖前於三岔口以北陳家溝添挖減河別通北
塘入海但與南運河無涉若欲挑浚捷地興濟舊有減河其下游
久已淤成平陸工大費鉅無此財力只可另行擇地酌辦上年秋
冬臣飭統領盛軍天津鎮總兵周盛傳天津道吳毓蘭候補道史

寬寬往復相度查得津城東南相近海口地面業經盛軍自開直
河一道以爲軍民營田灌溉之用上自興農鎮下至西大沽出海
計長九十里並有橫河六道各長數里旁流分洩而入海河尾閘
又有無數溝渠左右縈帶大可因勢利導爰議自上游靜海之靳
官屯南運河東岸起至興農鎮六十餘里開成一河即可直接該
軍營田之河分洩南運盛漲入海免致全注天津三岔口壅遏爲
患察勘地勢既順下口亦暢其間大半城地並無廬墓且下游已
有九十里現成之河可期事半功倍遂酌定開挖口寬十丈至十
二丈底寬四丈五尺至七八丈深八尺至一丈二三尺挖出之土
於兩岸十丈外各堆成隄庶隄內其有三十餘丈容水之地其靳
官屯河頭建石質雙料五孔大橋一座以資啟閉沿河分建石
鐵柱板橋四道以便行人惟庫款極絀勢難全雇民夫辦理不得

不借資兵力常飭抽調盛軍步隊十一營銘軍步隊十營古北口保定大名正定河間等處練軍步隊十三營共合三十四營卽貴以挑河堆隄事宜於今年二月初齊抵工次分認段落興辦每營酌給鍬筐器具等銀一千兩先期派員勘清界址丈量隄河所佔民地分等核發價值除糧租一面購料集夫建造閘座橋道以工代賑正值春冰甫泮積水盈途且地近海灘掘下二三尺又復出水工程甚形棘手在事員弁不辭艱苦親率兵夫設法挑溝戽水節節搶辦胼手胝足悉力經營卽於四月二十日全河挑挖完竣兩岸堆築成隄並於隄外另挑溝道以瀉附近瀝水而免漫淹民田臣於四月二十七日親往周歷查驗丈尺均過原估河身道暢橋閘堅固上洩南運盛漲之水下注盛軍營田之河於水利農田實有裨益而津城迤西至東阡陌縱橫河渠複繞堪限戎馬之

是亦於海防局勢有裨將來啟壩放水其尾閘應否再建攔潮閘
座或沿河向應添建橋道隨後察看酌辦仍飭該鎮道等妥籌修
守章程督同地方文武隨時認真經理以垂久遠各營兵勇勞苦
出力已酌給賞犒分別留防撤回所需餼筐器具地價賞犒及橋
閘工費統於賑撫項下勻撥循照歷次成案彙開清單奏報所有
接開南運減河匏期挑築工竣緣由理合恭摺具

奏伏乞

皇太后

皇上聖鑒謹

奏

馬廠報墾章程摺

光緒六年五月十三日

奏爲查明惠鑑報墾馬廠地畝酌議現辦章程恭摺仰祈

聖鑒事竊查戶部奏稱止自旗蒙古一等義烈公惠鑑獨石口外馬廠地畝既經呈明報效應由地方官妥爲經理該公不得與聞乃事閱多年迄未勘丈清楚於賦課無補絲毫由於該公先有招商之請嗣後旋招旋革屢次紛更其疊請換商難保非故意攪擾延宕升科爲私收租銀地步現已彼此互控釀成事端奏交刑部審辦所有此項地畝應請

旨飭下直隸總督會同察哈爾都統趕緊派員飭屬親臨地所勘明成熟若干頃畝限議則升科察度地畝肥瘠核實徵收數目並設立戶總責成地戶一面將押荒銀兩赴部交納一面將應徵租息由官經理解部其該公應得每畝私租銀四釐應令地戶一併

交官由該公自行
人向官收取不得由族中人私向地戶徵收
致滋紛擾嗣後如遇因災蠲緩之年官私各租應行豁緩該處地
局業經封閉應將商人名目革除如有該公前派商人及該公親
戚在彼把持藉端滋事阻撓正課即飭地方官嚴行查拏懲辦該
地方官亦不得任聽胥役地盤在彼把持匿租違則參辦等因光
緒五年十一月初六日奉

旨依議欽此經戶部知照到臣當即咨行遵照一面札飭藩司遴
委候補直隸州知州鄒振岳前往會同詳細勘辦茲據該員鄒振
岳稟稱奉前署察哈爾都統景煦面諭此地邊界早經指分明晰
無礙游牧不必再委旗員逐經會同勘石口同知希拉本查明該
廠地畝先已畫分七牌牌各有長因傳集牌長諭令造具地畝草
冊訂期移住地所出示曉諭凡持有商人私照交過地價者均歸

已舉逐戶挨段丈畝清楚其計已墾地六百二十八頃九十畝督飭經書造具清冊照章設立戶總一名旋經現任察哈爾都統祥亨檄委正白旗理事旗員瑞全到地三面將舊指邊界重加辨證已墾地畝均未越界惟查此項地畝若起手卽歸官辦祇須遵照部章次第經理本白井井有條茲承問辦積弊之後情僞百出枝節橫生非稍予變通不免滯礙難行之處非詳爲布置實有散亂無紀之虞非追問革商不足以清逋欠非體恤地戶不足以廣招徠該員躬親目覩虛已采訪兩月之久始得窮源竟委力洗商人

蠹

國害民積弊擬具章程十一條稟由藩司轉詳前來查所擬章程甚爲詳盡切當臣逐條確核酌定卽飭次第辦理謹繕清單恭呈御覽伏乞

皇太后

皇上聖鑒訓示敕部立案現在口外張獨多三廳各旗官荒馬廠已欽奉

諭旨調派前口北道奎斌馳往督同印委查辦並體察就地籌餉練勇事宜擬令仿照現議各節酌定進行章程續行奏辦其各地押荒租項究有若干應俟查明留充防餉分撥濟用合併陳明謹奏

謹將查明獨石口外應鑄馬廠地畝酌議現辦章程十一條
繕單恭呈

御覽

一酌定完租科則也查戶部奏定章程開墾王公報效馬廠地畝
每畝完官租銀一分四釐遇閏每兩加增銀三分正銀每兩加耗
銀五分月加該王公每畝私租銀四釐又督親王交官廠地每畝
議官租銀一分八釐今義烈公應鑄廠地礮薄沙多土少土深者
不過尺許淺者僅五六寸下則沙石間雜枯燥鬆浮加以天氣嚴
寒只宜莠麥胡麻菜子數種四月下種七月收穫若見霜較早則
籽粒枯殍若狂風怒作則苗穗摧殘中稔之年不過十逢四五應
令每畝完納官租銀一分四釐以示平允遇閏每兩加增銀三分
正銀每兩加耗銀五分即令該廳徵收報候撥解另加該公每畝

私租銀四釐遵照部章一併交官由該公自行遣人向官收取不得私向地戶徵收致滋紛擾如遇災年核實勘定分數將官私各租一律酌緩

一已墾之地應令革商與地戶分交押荒銀兩也查該革商從前放地藉口工本每畝向地戶索價二錢或二錢二三分其實牛犂籽種皆地戶自行備辦該革商所得之價無非任意浪費此時若令地戶重交則一地二價若全數向該革商勒賠恐亦難措應照下則每畝押荒銀二錢之數責令地戶賠交一錢請領部照其餘一錢押令革商交出該革商如敢佈詞推諉立即查抄監追以免地戶偏枯

一未墾之地應照下則完交押荒銀兩也查戶部奏定章程上則每畝交押荒銀三錢中則二錢五分下則一錢此地本屬饒薄已

經墾熟者每畝與價不過制錢二百五十文是下則押荒之數已
浮於成熟地價之數上則中則更不得言是以部章一置地戶皆
不願承領統計廠地未種者尙多與其多取而有阻招徠不若寡
取而迅行開墾或以商人放地每畝索價且過二錢曷爲完交正
項反苦其重不知商人放地隱匿多端每號雖稱五頃實核營至
加倍若歸官勘丈不過尖角畸零少留餘地斷不至贏長太多則
押荒銀兩亦應核實應令照下則每畝二錢之數完交以期允協
一地戶呈請免交押荒應立案不行也查領種官地呈交押荒本
屬定例且爲數無幾乃從前誤於招商弊端甚多如張家口廳所
屬之西和城臺子溝白廟子灘等處皆未遵辦無非句串蒙混飾
詞免交實則地戶交商之款計已不菲上無補於
國計下無益於民生偷漏侵欺徒資中飽嗣後應永遠革去商人

名目痛除宿弊一律令其完交押荒銀兩其止有商照而未領部
照者酌量押荒科則照民商分賠之數通行補交庶事歸核實亦
於庫儲有裨

一交納押荒請領執照宜稍變通也查戶部奏定章程認墾之戶
押荒銀兩在部交納由部發給收銀執照在該地戶照數認墾惟
地戶零星押荒多則數兩少則數錢斷難責令在部交納領照致
使往返苦累若令戶總彙交彙領雖保不侵蝕逃匿應由戶部多
備空白印照迅速編號發直現在口外旗荒已派前口北道奎斌
前往查辦即由臣轉發該道收存曉諭各地戶就近交銀領照嚴
禁吏役不准絲毫需索照內填注已未墾熟字樣及花戶姓名銀
地數目仍截留照根彙總解部查核如此方可便民領地當較踴
躍至地戶領照以後指分地段應責成戶總仍由地方官隨時抽

查以防蒙蔽

一現種熟地應暫行分收花利也查該革商從前放地除按畝案價給與私照外另有四路民人當耕作時雲集該廠隨便墾種秋收時所得花利種者八成商人二成計畝分收該民即搬運回家明歲復來墾種其在地居住者不過十之一二地戶無些須之費而果腹遠颺商人無幾微之勞而抽頭坐享殊屬不成事體現值耕作之時民人來者已多若驟行禁止則勢有不能若遽令升科則力有不逮已飭印委各員責成戶總及各牌長分段稽查限五月初一日造具清冊一俟秋成先由委員詳細覆查按畝分收二成就近變價易銀報候撥解並咨戶部查核其以前商人私抽者應計畝按年責令該革商賠償所有分收地畝應自光緒七年為始一律升科每畝交押荒銀二錢給予執照如地戶把持不肯分

收立即拘拏懲辦

一已墾之地應酌定升科完租年限也查戶部奏定章程開墾馬廠地畝均令三年後升科今此項廠地各地戶所領商人私照年限不一有自光緒元年者有二三年者有領地雖在元二三年因商人充單原常地照更換不定歷至四五兩年始行開墾者若按其給照早晚以定升科先後其中參差錯迕易滋弊端應令自光緒六年爲始照依丈清數目一律升科完租其未經領有私照者統歸試墾照章三年後升科庶條理分明地戶易於遵循

一地歸官辦宜將商人通行裁革也查口外自商人辦地以來侵蝕押荒私抽租稅已屬有妨庫款且往往指地詐財所坑陷者無慮數十百戶新舊各商又互相爭鬪剽奪劫殺放火延燒種種不法實堪髮指今雖明白曉示以地歸官辦商人不准與聞而地戶

總不免觀望懷疑藉口於某地某商仍未斥革此地商人亦恐旋踵復充轉致挾嫌陷害受累不休此固愚民過慮但或留或革事出兩歧亦非政體所宜且商人在地一日押荒必不能交部照必不能領升科必不能辦應請將直督口外各屬旗荒馬廠地畝凡有商人者一律革退統交官辦如敢隱身阻撓從嚴治罪斯款項有著積弊全清矣

一妙香寺附近宜酌留餘地也查惠鑑馬廠東北隅有妙香寺舊住喇嘛該公府原派牧丁閒亦在此牧放應於寺之南面留五里西面留三里東面留五里北面地勢寬展水草豐美酌留二十餘里至公吉諾一帶以作喇嘛及牧丁養贖牧放之地仍丈清界址刨掘壕塹不准越界游牧又偏北之達木諾地方舊有鹽廠青鹽進口多屯於此房地租稅向由公府收取應於廠之四面酌留餘

地以外仍招佃開墾其所留之房地租該公府照舊收取庶界地分明旗民爭端可息

一馬廠界限宜責成各王公與察哈爾旗員自行辨證也查口外各馬廠多與察哈爾各旗地界毗連從前商人試墾指界最爲輻蒙古山名地名重複隱與繙譯猝難明晰往往東西移位遠近易方塚壠既挖旋又填毀其於相近邊界開墾者今猶爭論不休加以會勘時人眾費煩動輒需銀一二千兩該商卽以誣詐之錢財開銷支應今地歸官辦事核實何從來此巨款以支冗費嗣後凡有馬廠各王公情願報墾者應責成該府持當年實地圖據與察哈爾旗員親赴地所詳細辨證將界址指分清楚然後交地方官辦理如此則滯礙較少事易就理至張獨多三廳以外幅輒遼闊凡可報墾之地不過附近邊牆實與游牧不相妨

擬具其開荒而徒長蒿萊何若廣闢而盡成隴畝擬請飭令地方官查明附近馬廠凡可開墾者先行報明奏請

敕下各王公如願報效卽呈請開墾仍照部定章程專歸地方官經理無須該府與聞如此辦理不惟有裨庫儲且各王公私租所人較平日水草之料計亦倍徙升科後糧地鱗次銜接漸成村落於邊塞防務亦不無稍裨

一委員辦理荒地宜酌給薪費也查口外各處馬廠多者萬餘頃少者千餘頃幅幘之廣比於州縣如皆辦理得人於

國計民生均非小補但聰強而近刻者知重賦課而或不便於民仁厚而近迂者知恤農氓而或無益於

國加以地勢嚴寒棲處卑陋飯食粗糲履勘辛勤非明幹耐勞之員不能勝任其緊要關鍵尤在潔已奉公絲毫不得擾及地方足

以感動愚蒙懾服刁健楊腹從公賢者所難應量事體之大小道路之遠近時日之久暫酌給薪水嚴其責成並將隨帶書役應需飯食紙張及解費等項統於所收押荒銀內核實作正開銷事竣停止其委員認真出力並於事竣酌請獎敘以昭激勸

請豁霸州官地租銀片

光緒六年五月十三日

再霸州革退園頭孫三馬名下人官地畝前據該州勘議每畝徵銀一錢三分五釐咨非部覆自光緒五年起照議徵入於旗租奏銷存退項下造報並令將陳欠租銀奏請豁免等因當經轉行遵照茲據霸州知州宋文詳稱孫三馬名下原有地四頃七十九畝六釐三毫除短少地三十畝三分五釐八毫另行確查外實計原報及續行查出其地四頃四十八畝七分五毫每年每畝徵銀一錢三分五釐其應徵正銀六十兩五錢七分五釐又加一耗銀六兩五分八釐查自道光二十六年入官起至光緒四年止均因地未查明租未議定無從開徵現已事隔多年且地方災歉頻仍民情困苦自應遵照部議聲請豁免造具冊結由司轉詳前來臣覆核無異相應仰懇

天恩俯准將霸州革退國頭孫三馬名下入官地畝自道光二十
六年起至光緒四年止民欠正耗租銀豁免以示體恤除冊結送
部外理合附片具陳伏乞

聖鑒訓示謹

奏

奏留劉士奇片

光緒六年五月十三日

再頭品頂戴記名遇缺題奏提督前署貴州提督古州鎮總兵劉士奇自咸豐年間帶勇在江南軍營剿賊懋著戰功嗣督師至滬調派該員隨同提督程學啟前敵攻剿疊克蘇常嘉湖郡縣各城先後統領八營所向克捷屢蒙

天恩賞穿黃馬褂給雲騎尉世職簡放總兵實缺旋調赴東豫協勦捻逆事竣飭赴貴州本任帶兵剿辦苗匪一律肅清光緒三年八月丁母憂開缺回湖南鳳凰廳原籍現屆服闋請咨赴京路過天津臣稔知其久當大敵訓練嚴明忠勇可靠正值籌辦海防之際擬請

旨准其留營差遣以資臂助遇有各省提督總兵缺出仍照例由軍機處請

旨飭放俾勵戎行除將該提督齊呈湖南撫臣咨冊咨部查照外
理合附片具陳伏乞

聖鑒訓示謹

奏

文報局請獎片

光緒六年五月十三日

再臣接准出使英法德俄各國大臣曾紀澤谷開隨帶出洋人員已屆三年期滿照章奏請獎敘其文報局員黃惠和等經理周密均屬勤奮本擬一併彙辦惟該員等接遞出使東西洋各國大臣及南北洋大臣文報應如何議獎應由南北洋大臣核奏等因飭據江海關道劉瑞芬天津海關道鄭藻如詳稱前奉吏部奏定出洋隨員保獎章程照異常勞績准保免補免選以應升之階選用補用查同知黃惠和先經出使英國大臣奏派接遞文報嗣在上海設立總局添委王松森幫辦又派知府惲桂孫通判朱璋達於天津設立文報處凡出使英法德美日秘日本等七國大臣奏摺摺諭旨並與總理衙門南北洋大臣各省文武衙門來往公文函信均由該員等接收遞發事關中外機密頭緒繁多經理數年毫無

貽誤其至要者則用電報傳遞或搭坐輪船往返寄送較之出洋
隨員僅辦一國一事者更形勞瘁洵屬異常出力自應與出洋人
員一律給獎以期公允所有上海委員分發江蘇試用同知黃惠
和擬請免補本班以知府仍留原省儘先補用五品銜應升之缺
升用分發廣東候補知縣王松森擬請俟補缺後以同知補用天
津委員三品銜道員用候補知府惲桂孫擬請俟補知府開缺歸
道員後加二品銜同知銜北河候補通判朱璋達擬請俟補缺後
以同知直隸州知州遇缺補用上海局書候選從九品李鴻翊擬
請免選本班以按察司照磨儘先前選用朱璋達雖係河工人員
惟派差在部定新章以前且辦理洋務文報與地方差事不同合
併聲明等情前來臣覆核並無冒濫理合會同南洋大臣江蘇撫
臣吳元炳附片具陳伏乞

聖鑒訓示謹
奏

定造鐵甲船摺

光緒六年六月初三日

奏爲前議定購英國鐵甲船二隻現據電報英不肯售擬令訪求新式剋期在洋廠訂造以備戰守恭摺仰祈

聖鑒事竊本年二月間接據出使大臣李鳳苞函稱英國海部允轉售土耳其八角臺鐵甲船兩隻諒屬當趁中國未開鄰衅之前成議等語臣當卽電覆該大臣迅與定議一面奏請

敕下福建將軍督撫臣先行湊解柏爾來一船價銀欽奉

寄諭飭遵在案嗣准穆圖善何璟等籌湊規平銀六十萬兩解交江海關道彙同部撥三十萬出使經費提墊二十萬存備撥兌方冀該船早日成交來華應用詎接李鳳苞四月十九日電報英新部臣不肯售鐵甲應否擇善訂造又李鳳苞四月初五日函稱英海部易人暫執政所允二鐵甲均作罷論當此中俄交涉喫緊之

時新聞紙議論紛紛英國家礙於公法不能再踐前言應否赴英
廠另行訂造之處望酌核示遵各等語臣查中國購辦鐵甲船之
議已閱數年祇以經費支絀迄未就緒近來日本有鐵甲三艘遠
敢藐視中土至有臺灣之役琉球之廢俄國因伊犁改約一事疊
據探報添派兵船多隻來華內有大鐵甲二船噸數甚重被甲甚
厚無非挾彼之所有以陵我之所無意殊叵測鐵甲若非利器英
人何至忽允忽翻悻弗肯售今欲整備海防力圖自強非有鐵甲
船數隻認真練習不足以控制重洋建威銷萌斷無惜費中止之
理臣早慮英或見好俄人不肯轉售已於四月十七日緘屬李鳳
苞如所議無成即查照新式在英廠訂造鐵甲二隻應以何廠何
式爲宜約幾年造成價分幾次勻付請其迅速酌定電示誠以需
用孔亟之器又得籌備有著之款若因循歲月坐失事機豈不可

惜現計閩省解存上海及部撥並提出使經費約一百一十萬又總理衙門奏定南洋擬購碰快船之六十五萬合共百七十餘萬以抵訂造兩號鐵甲船價所短不過數十萬俟李鳳苞在洋議定合同起造分次籌匯期限較緩力量稍紓容隨時會商南洋大臣妥籌奏明請

旨辦理抑臣更有請者中國南北洋面將及萬里僅有鐵甲船兩隻分布不敷仍無以振

國威而壯遠勢況現擬訂造之船應分閩省南洋各一隻北洋爲京畿門戶處處空虛無論何國有事敵之全力必注重在北若無鐵甲坐鎮僅恃已購之碰快船數隻實不足自成一隊阻扼大洋則門戶之綢繆未周卽根本之動搖可慮以臣愚見北洋應再定造鐵甲船二隻所需經費亟應豫籌湊撥查有淮南北鹽兩議

捐報效銀一百萬兩分岸分年按引收解在戶部爲課釐外加增之款非正項可比原爲籌防起見與其零星支放仍無濟於大宗軍需不若湊作整款可有裨於防海利器又本年三月間經臣奏定各省撥借輪船招商局官款擬於該局運漕水腳項下分年扣還計每年應拔還銀三十五萬餘兩在各省多屬閒款其繳還之多少有無無關緊要應請酌提招商局三屆還款約一百萬零抵作訂造鐵甲之需分年撥兌於軍國大計裨益非淺目今時勢艱危極矣議者擬臂言戰每怪海疆防務有名無實又不肯籌集巨款自來兵事非餉莫辦卽如俄兵號稱強盛鐵甲船及後門鎗礮皆所素備然曾紀澤來信今春俄猶在英國銀行借一千五百萬金鎊已合銀五千二百餘萬兩又向德奧各國分借巨款是其不惜糜費以與我爭勝而我猶執往日之軍器兵餉以禦強俄得失

之數可揣而知且今之餉源更窘於咸同用兵之際臣謬任北洋海防歲撥經費僅解到三四十萬而費以籌顧遼海千餘里洋防雖才力百倍於臣者亦無可爲也臣明知訂造鐵船卽使款項湊手亦須三四年乃可來華但不及今定辦以後更無可辦之資能辦之人而洋面毫無足恃目前俄人窺犯固無從鎮扼卽日後他國憑陵亦將何以抵禦耶伏求

聖明規畫久遠力破浮議

俯允所請飭下戶部及江浙各督撫臣照撥兩淮捐項及招商局按年拔還之款俾資續造鐵甲爲北洋捍門戶爲

京畿固根本俟奉

旨後臣卽電屬李鳳苞酌擇洋廠一併訂造嗣後應辦事宜仍由臣次第妥晰籌議具奏至碰快水雷等船皆所以輔佐鐵甲戰守

兼資需款較少應由南北洋自行籌湊隨時添購不在此數蓋有鐵甲而各船運用皆靈無鐵甲則各船僅能守口未足以言海戰也所有英國鐵甲船罷議擬另籌在洋訂造各緣由謹繕摺由驛五百里密陳伏乞

皇太后

皇上聖鑒訓示施行謹

奏

撥補出洋肄業經費摺

光緒六年六月初三日

奏爲閩廠出洋肄業生徒各項經費尙不敷銀二萬三千兩擬請於出使經費項下暫行撥補恭摺仰祈

聖鑒事竊臣接准船政大臣黎兆棠咨稱閩廠出洋肄業生徒原奏三年爲限原估約需經費銀十九萬二千六百五十兩零內閩省稅釐局勻解四分之二閩海關四成洋稅勻解四分之一船政勻撥四分之一並聲明第一年酌帶學生出洋量繪游歷及三年內華文案並隨員學習交涉公法應支脩金等費未計在內核計三年限內閩海關稅釐局船政所勻之款業經分年匯解在案茲准監督兼出使大臣李鳳苞開摺補領三年限內不敷經費一千鎊續留生徒約估經費一千九百餘鎊購置書籍約估四百四十鎊華洋員生徒回國路費三千六百鎊約共七千鎊約合庫平銀

二萬六千四百兩又奏准分賞四洋教習寶星金牌約工價銀七百餘兩統共約銀二萬七千一百餘兩除出洋本款僅存銀四千一百餘兩外尙不敷銀二萬三千兩既准李鳳苞咨催補解未便久延而船政支絀異常無力設籌咨請轉商總理衙門在於積存出使經費項下照數撥補以濟急需等情前來臣查原估出洋肄業生徒經費本係約略撙節核計其不敷之數自應隨時籌補茲船政費用支絀異常黎兆棠疊次來函幾於朝不謀夕實屬無可籌措而續留在洋生徒肄習正勤及各員生回華路費奏准頒賞英法各教習寶星金牌等款皆關緊要刻不容緩既據咨請於出使經費存項內暫行撥補爲數無多且同是出洋用款情理亦順臣因轉咨總理衙門核覆頃准函稱尙可照撥應由臣奏明辦理等因合無仰懇

天恩俯准暫行照數撥給以濟出洋生徒要需嗣後續遣生徒仍由閩省將軍督撫船政大臣會商就本款籌解免致顧彼失此除
候奉

旨後再咨行照辦外謹繕摺附驛具陳伏乞

皇太后

皇上聖鑒訓示謹
奏

奏保馬建忠片

光緒六年六月初三日

再候選道馬建忠前經臣調津隨辦洋務精通法國語言文字兼習科舉之學志趣端正心地明敏頗堪造就光緒二年十一月臣於會奏選派開廠學生出洋學習摺內聲明派充出洋隨員並令於各國交涉公法律例等事認真講習仍由監督李鳳苞隨時督查功課俟學成後訂請專門洋師考驗具報本年三月接據李鳳苞咨稱該員馬建忠出洋以來肄習交涉公法律例格致政治文辭均經考試取中領有官憑學已卒業應即送回供差該員持躬謹慎爲外人所敬重尤稱品學兼優或備充出使人員或備諮詢例案以與洋員辨論均堪勝任等因該員於三月間回津謁晤將在洋先後應考所得五次官憑呈驗臣遂加考詢華學既有根柢西學又有心得應試以事均能折衷剖晰不激不隨凡過津各國

公使領事無不同聲引重實堪勝專對之選該員出洋三年勤學
好問周歷法英德奧瑞士比利時義大利等國聞見博洽又兼充
出使大臣郭嵩焘曾紀澤緝譯官歷著辛勞今學成而歸自應照
案酌給優獎相應請

旨將候選道馬建忠

賞加二品銜並交軍機處總理衙門存記備充出使各國之用於
時局當有裨助理合據實附片具陳伏乞

聖鑒訓示謹
奏

巴西遣使議約摺

光緒六年六月初六日

奏爲巴西國遣使來華議約已抵天津會晤請

旨遵行恭摺仰祈

聖鑒事竊臣前接出使英法大臣曾紀澤函稱巴西遣使來華立約先在英法國會商該大臣求爲轉致並善意招工一事該大臣已切實勸阻據該使喀拉多密談云中國既不許提招工之事巴西當照錄中法通好之約赴華訂定等語旋准總理各國事務衙門咨鈔本年二月十四日具奏巴西遣使來華議約請

飭南北洋大臣就近會商辦理一摺奉

旨依議欽此欽遵知照前來巴西使臣喀拉多等於五月初間行抵上海據江海關道劉瑞芬稟報接晤該使商請在滬久住如有商辦之事候稟請南洋大臣與臣處核示不必赴津該使堅欲北

上卽於六月初一日抵津初三日送來照會內稱巴西願與中國
實心友睦特簡該大臣來華商辦一切事宜明定條款酌立和約
並請示期往謁等因臣當卽函覆令於初五日巳刻來晤是時該
正使喀拉多副使穆遠率同參贊李詩圃繙譯官微席葉等四人
至署接見詞意甚爲恭順經臣再三開導兩國相隔太遠欲聯邦
交自可其敦和好不必遽立條約俟該國以後商船來華生意興
旺然後再議約章該使堅稱奉命前來通好立約兩國和好總以
條約爲憑若議約不成有失該國體面且前在法國已向曾紀澤
商明專爲議約而來務求轉奏

大皇帝俯准照辦等語察其來意懇誠似難固拒誠如總理衙門
原奏該國若爲修好通商立約自有成案可援至招工一節斷難
應允該使既遠道來此欲循西國通例議立通商條約並未提及

招工揆度理勢不能不允惟在相機辨論查照各國約章酌議變通應否請

旨特派議約全權大臣就近會商妥辦以免該使臣等赴京瀆求所有該使遞呈照會一件照錄恭呈

御覽除將會晤該使問答節略鈔送總理衙門備查外理合專摺由驛具陳伏乞

皇太后

皇上聖鑒訓示遵行謹

奏

訪醫保送摺

光緒六年六月十一日

奏爲遵

旨訪醫保送候交太醫察奪隨同診視以備參酌恭摺仰祈
聖鑒事竊臣承准軍機大臣字寄光緒六年六月初七日奉
上諭現在

慈禧端佑康頤昭豫莊誠皇太后聖躬久安已逾數月疊經太醫
院進方調理尙未大安外省講求岐黃脈理精細者諒不乏人著
詳細延訪如有真知其人醫理可靠者無論官紳士民卽派員伴
送來京由內務府大臣率同太醫院堂官詳加察看奏明請旨等
因欽此臣伏讀之下敬念

慈禧端佑康頤昭豫莊誠皇太后垂簾聽政以來勵精圖治日昃
不遑適值時事多艱

宵旰憂勤積勞致疾

聖躬關係

宗社安危者甚重亟應設法調治速愈以慰天下臣民之望

微臣

受

國厚恩誼關休戚私衷焦系寢饋難安斷不敢以無人可派稍涉推諉竊維醫之爲道脈理至奧而門戶亦最多嘗見有同醫一證選藥則寒溫之不同同用一藥分量則輕重之不同巧偽之輩更或挾其平平寡效之方委蛇從事日延一日以至輕病轉重其最下者則又泥守成方強病就藥冀以倖中於萬一即使藥不對證以爲成書具在援引舊按總可免人指摘病情朝夕變更彼成方烏可恃乎臣愚以爲診病之要全在醫者心靈手敏因時制變法在猛攻非但枳朴可投卽硝黃亦非所忌法當峻補非但參茸可

餌卽金石或且頻施至若肝木爲病之自有起伏尤非庸工所能測識當其病之起則藥與證對而未必驟平然暗中之受益良多也及其病之伏縱藥與證乖而未必猝發然日後之爲患更劇也此又非素具學識之良醫不能堅持定見徐收成效苟稍不持重而爲病情所搖惑醫者必且茫無主張貽誤實非淺鮮臣遂加諮訪查有二品頂戴按察使銜前任山東濟東泰武臨道薛福辰由舉人出身研精醫理有年洞五運六氣之源曉三部九候之法觀書既富臨證亦多臣妻素患虛羸屢延診治極有效驗委係真知可靠之人前聞該道服闋到京候

簡尚未得缺經臣札調來津襄辦洋務茲欽奉求醫

明詔當卽詢以

聖躬欠安是否堪勝診治該員惶恐萬狀一則以治病全在察色

審脈

天威咫尺不免震驚一則其治法與時手迴殊恐難合轍堅辭再
四臣伏思醫學各有專家不取其同而轉取其異設使該員處方
論藥一一與太醫脗合則是調理各法太醫院已診治數月尙未
大安正無庸濫竽充數益以該員之附和惟其治法迴異似堪飭
令馳詣

闕廷恭候

命下隨同太醫敬謹診視討論方法藉資參酌不無稍裨惟奉
旨既令太醫院堂官詳加察看方得隨同參酌是療病本太醫之
專司凡一方一藥該員固不妨據理直陳在太醫尤須悉心考訂
遇有應需膏丹丸散統應候院官核准進奉庶於慎之又慎中寓
集思廣益之道矣儼蒙

俞允臣卽催令該道薛福辰卽日起程進京以赴軍機處報到毋庸另行派員伴送以期迅速所有避

旨訪醫保送以備參酌緣由謹繕摺由驛五百里馳陳伏乞

皇太后

皇上聖鑒訓示遵行再該員薛福辰到京經太醫察看後或以議論不合礙難參酌應請

旨飭仍回津差委以資臂助合併聲明謹

奏

籌辦畿防摺

光緒六年六月十一日

奏爲新任提臣現已抵直卽赴東路沿海察勘布位請調回駐奉直軍以重畿防恭摺仰祈

聖鑒事竊臣前以北塘迤東至山海關沿海袤延五百餘里處處空虛商令前任提臣郭松林親往察勘其開口岸歧出如蠅頭沽浦河口金沙嘴秦王島老龍頭等處水勢較深輪船可泊以登岸巡達京城必須分駐營壘添築礮臺奏請將奉天原調古北口練軍步隊一營馬隊三哨天津練軍鎗隊兩營全數撤回並調郭松林舊部留紮襄陽之武毅步隊三營馬隊一營來直擇要扼紮欽奉三月初三日

寄諭郭松林舊部著李瀚章飭令卽行拔隊來直奉天原調古北口天津練軍俟宋慶一軍到奉後能否撤回著岐元體察情形奏

明辦理等因欽此郭松林旋卽病故直隸提督員缺奉

旨著李長樂調補當經咨催迅速前來接辦茲武毅馬步隊四營

於六月初五日馳抵靜海暫紮李長樂交卸湖南提篆後兼程前

進由湖北附搭輪船於六月初八日到津臣卽商令接統武毅各

營先赴北塘迤東至山海關一帶詳細察勘將分駐營壘添築礮

臺事宜妥籌布置再行赴任惟該處沿海袤延五百餘里僅止四

營斷難分布直隸兵力甚單餉需又極支絀自奉

命籌辦海防未敢添練一營臣所部淮軍前遵部議裁減一萬一

千餘人只留二萬八千餘人因食江南之餉須兼顧江南之防現

在吳淞口至江甯沿海沿江一帶仍係淮軍扼紮其在直隸者不

過二十餘營津沽乃各國山海道入京正路北塘迤東各海口相

爲犄角必須重兵分守地段寬廣路路可通兵力實嫌單薄此外

別無他軍可調奉天原借直軍本係暫局曾經崇實等商明俟該
省剿匪事竣即行撤回今逾數年延未遣撤查該省剿匪早已竣
事現留直軍不過彈壓內地較近畿布置海防輕重懸殊況宋慶
之九營已於前月到防可資控扼更不應藉詞久假不歸在該省
借用直軍又食直餉本甚便利若仍令體察情形難免稽誤相應
仰懇

天恩俯念北塘連東各海口爲巡達京城之路防務甚關至要嚴
飭岐元除馬隊三哨已經撤回外將現駐奉天之古北口練軍步
隊一營天津練軍鎗隊兩營剋日全數撤回以便擇要扼紮而重
畿防否則嗣後即改由該省籌給月餉俾直隸騰出餉項另行照
數趕緊添練應用亦屬兩便之法理合恭摺由驛具陳伏乞

皇太后

皇上聖訓示謹奏

天津縣請予升缺摺

光緒六年六月二十一日

奏爲海疆緊要知縣缺苦差繁請量予升途以資鼓勵恭摺仰祈
聖鑒事竊照天津縣知縣一缺本屬繁難瘠苦自各國通商以來
中外交涉事件日多南北往來差使日眾皆係例外供應益覺賠
累不支前已改爲衝繁疲難沿河海疆最要之缺撫綏彈壓責任
綦嚴非精明幹練之員不足以資治理非量予超擢之路不足以
勵人才查奏定章程遵化易州兩直隸州缺出先以大興宛平兩
縣升補一次次以清苑縣升補一次又以大興宛平兩縣升補一
次再以順屬直隸人員升補一次以四缺爲一週誠以大宛清苑
差務繁劇故須優予升途用昭激勸今天津縣爲通商口岸北洋
總匯之區繁難情形倍於往日甲於通省較大宛清苑差務之繁
政務之劇殆尤甚焉其輪升班次則統歸直順屬人員內酌量

揀選不特事涉偏枯亦非鼓勵人才慎重地方之意自應變通舊
例俾與大宛清苑一體輪升以示體恤據藩司任道鎔署臬司葉
伯英擬請嗣後遵化易州兩直隸州缺出先以大興宛平兩縣升
補一次次以清苑縣升補一次又以大興宛平兩縣升補一次再
以天津縣升補一次至第五缺以順屬直隸人員酌量揀選一次
以五缺為一週輪應天津縣升補時仍照章不計京異人員輪應
順屬直隸人員揀選時如將應升之員請升先儘京異人員其天
津縣知縣若係京異合例應升之員並准一體酌量升補不積天
津輪升之班此僅就遵易兩缺斟酌變通無礙通省升補班次亦
於海疆要缺有裨至現擬輪升班次並請連前積算餘照定例辦
理等情具詳前來臣覆核所詳洵屬公允應請照辦理合恭摺具
陳伏乞

皇太后

皇上聖鑒敕部議從施行

奏

郭松林之妾殉節片

光緒六年六月二十一日

再據護理直隸提督陳飛熊等呈稱前任提督郭松林之妾趙氏係江蘇甘泉縣人賦性幽嫻能知禮教郭松林因勞受傷舊症復發該氏親侍湯藥歷十餘晝夜未嘗稍懈郭松林病革謂該氏曰吾若不起汝年幼無子女宜自爲計該氏毅然願相從地下迫四月二十一日戌刻郭松林身故起治後事不期二十二日寅刻該氏服毒以死家人趕救勿及似此從容殉節大義凜然請

旌表附祀前來查前有記名提督陳振邦之妻迎天樞於清江浦遂以身殉難

臣奏奉

諭旨准于旌表並附祀該故提督專祠欽遵在案今郭松林之妾趙氏矢志靡他青年殉節尤堪嘉憫相應請

旨准其旌表並附祀該故提督郭松林專祠以彰節烈理合附片

具陳伏乞

聖鑒訓示謹

奏

請催海防經費摺

光緒六年六月二十五日

奏爲北洋海防經費各省關報解無幾請

旨嚴催以警玩泄而維大局恭摺仰祈

聖鑒事竊維北洋屏蔽

畿輔海防關繫重大今日之政務無有切要於此者光緒元年戶

部等衙門原撥經費摺內稱各省關儻有推延情事卽山南北洋

大臣指名奏參前數年事機稍緩臣惟恐各該處兼顧爲難雖解

不足數未肯遽予參劾本年俄事漸形決裂鐵甲兵船陸續東來

事機之緊急防務之危險百倍於前而籌餉又爲籌防之本是以

於本年三月初一日專摺

奏催經費摺內詳言海防事體繁重非的餉到手不能興辦各省

關廷延處分應仿照延誤京餉之例辦理又恐原撥數目各省實

有不能解是之處若予嚴議難昭折服請將各省奉撥釐金悉按原撥八折實數解足不足即照延誤京餉例議處嗣准戶部總理各國事務衙門會議具

奏准如所請辦理臣方謂各該督撫司道監督誰非臣子誰無天良自此次剴切奏催後必能共體時艱力籌報解孰意自本年正月至今已屆半年各關奉撥洋稅惟山海江海兩關尚係隨徵隨解其粵海浙海兩關自上年十一月二十日第七十八結以後時逾半年尚未據報起解實屬不知緩急各省奉撥釐金惟湖北省解到四萬兩江西省解到二萬兩又已報未到銀一萬兩年內能否解足原撥八折實數尚未可知江蘇奉撥釐金前據督臣劉坤一面述情形擬到任後再為竭力籌措惟浙江一省半年以來未據報解分文亦無存粟隻字具擬在該省必以留支協餉人不敷

出爲辭試問浙江留支之用與浙江協濟之各省視北洋海防孰輕孰重孰緩孰急該省釐金如半年以來未收分毫則已但有收項卽應先解臣處迺似此漠不相關置之度外誠不知是何居心今歲北洋已放之款如碰快船價六十餘萬兩後四鎗價二十數萬兩加以零星購定水雷機器員弁礮船薪水海口電報等項通計已用去百萬兩庫儲告罄其已訂未放之款更鉅不知何出焦急萬分若再將延欠協撥省分徇隱不言待至年終始行糾劾雖將該管司道從嚴處分於已失之事機何補乘此力圖報解猶可以速補運相應請

旨飭下浙江巡撫嚴飭司道監督趕緊如數報解大批以救眉急釐金必解足八成關稅必照章提前勿再因循貽誤此外湖北江西江蘇等處應解之釐金粵海江海等關應解之洋稅並請

例下各該督撫督嚴飭趕緊報解力求足額儘再延欠卽由臣
年終核參查照延誤京餉例議處臣爲海防緊要起見謹摺由
驛五百里瀝陳伏乞

皇太后

皇上聖鑒訓示施行謹

奏

淮軍軍需報銷摺

光緒六年七月十四日

奏爲淮勇軍需自光緒四年正月起到十二月底止收支款目造冊報銷恭摺仰祈

聖鑒事竊照淮勇軍需前截至光緒三年十二月底止業經列爲第六案報銷於光緒五年四月十六日具

奏奉

旨該部知道單併發欽此伏查光緒四年分淮軍分防直隸保定天津海口並各臺局護送糧餉軍械共計三十三營又提督劉盛休所部銘字馬步十七營係駐紮山東張秋一帶又福建陸路提督唐定奎所部銘武步隊十三營新授浙江提督吳長慶所部慶字親兵八營均係分防江蘇沿江南北兩岸礮臺連吳淞海口之武毅右軍五營徐宿馬隊五營共計三十一營統歸淮勇軍需案

內彙冊請銷前因餉源支絀於四年三月續將洋鎗步隊各營每棚抽裁正勇一成仁軍遣撤一營嗣又

奏明於盛軍鎗隊內酌裁五營銘軍鎗隊內酌裁四營武毅軍鎗隊內酌裁三營慶軍鎗隊內酌裁二營共裁十四營從四年九月起籌給欠餉分飭各統將陸續資遣以上裁留淮勇陸軍水師各營官弁員名勇夫開收總數征防處所先經造冊分咨軍機處戶兵部備考其應需薪費口糧正雜各款柴薪斤重價值駝騾餵養仍循楚軍營制

奏定章程在銷成案接續支發湘平折實庫平扣雜款一分平餘又馬隊倒補馬價照駐紮省分營驛例價核給采辦製造工價水陸轉運糧餉軍火雇用车船夫工價腳分別斤重程途里數照軍需則例恩屆在銷各案核給飭據金陵報銷局司道等詳稱自光

續四年正月起至年底止列爲第七案舊管項下實存銀七十三萬六千六百三十四兩三錢有奇新收項下江蘇浙江四川湖北等省額撥軍餉兩淮鹽釐及江蘇留防案內勦撥銀款同本案扣存平餘等項共銀二百八十九萬七千二百七十六兩二錢有奇內登除附列專冊請銷補放淮軍各營光緒三年十二月底以前欠餉銀二十三萬二千二百六十八兩八錢有奇又附請專案奏銷洋鎗礮隊教習辛工礮費操練後膛洋礮拉礮車馬餵養夫工金陵天津機器製造二局工料用款采辦洋軍火價值等項計三冊共銀一十五萬三千八百八十兩六錢有奇計本案收用銀三百二十四萬七千七百六十一兩有奇開除正雜各款遵照部議酌定軍需報銷章程各歸各部核銷計應歸戶部核銷銀二百四十萬三千五百八十三兩一錢有奇應歸兵部核銷銀四萬二

千五百二十三兩有奇應歸工部核銷銀七萬八千二百一十七兩七錢有奇統共請銷銀二百五十二萬四千三百二十三兩八錢有奇實存銀七十二萬三千四百三十七兩一錢有奇已撥支光緒五年正月起淮軍水陸營哨正雜餉項並購製軍火器械價值工料等用歸於後案舊管項下滾接造報等情具詳請

奏前來臣查淮軍分駐直東江蘇等省籌辦江海防務實關重要光緒三四兩年陸續抽裁步隊一萬一千餘名現值海防喫緊既就裁撤各營擇要調紮布置仍兼顧江南江岸海口此次造報光緒四年正雜款項均係循照應辦成案實用實銷並無絲毫浮冒除收支各數分晰造具細冊咨送各部並飭將以後用款接續清理造報外謹會同南洋通商大臣兩江總督臣劉坤一專摺具奏並繕簡明清單恭呈

御覽伏乞

皇太后

皇上聖鑒謹

奏

軍需交涉洋務片
光緒六年七月十四日

再查淮軍各營洋鎗礮隊教習通事工匠人等辛工金陵天津行營機器製造兩局工料及采辦外洋軍火等項截至光緒三年十二月底止業經附

奏准銷在案今自光緒四年正月一起截至是年十二月底止淮軍各營洋鎗礮隊教習通事工匠人等辛工礮費等銀三萬七千七百十三兩七錢有奇海防淮軍各營操練後膛洋礮拉礮車馬購價餵養夫工等銀三萬一千六百六十六兩三錢有奇金陵天津行營機器製造兩局委員薪糧工匠工食購買料物用款並采辦洋軍火價值等銀八萬四千五百兩五錢有奇以上總共請銷銀十五萬三千八百八十兩六錢有奇茲據該司道等按款復加查核均係奉文覈實飭發並無絲毫浮冒另造細冊詳請附

奏前來臣查前項各營洋鎗礮隊教習通事工匠人等辛工購買料物外洋軍火價值各款皆與洋人交涉無例可循仍應照案據實請銷除將細冊咨送總理衙門戶兵工部查核外伏乞聖鑒謹附片具

奏